

浙江文叢

輿地紀勝

〔第九冊〕

浙江出版聯合集團
浙江古籍出版社

浙江文叢

浙江出版聯合集團
浙江古籍出版社

輿地紀勝

〔第九冊〕

卷第一百二十九至一百五十二

〔宋〕王象之 編著 趙一生 點校

輿地紀勝卷第一百二十九

福建路

建寧府

建安 建陽 武夷 建州 建寧 富沙 浮溪

府沿革

建寧府，上。建州，建安郡。《九域志》。建寧軍節度。今制。《禹貢》：揚州之域。《元和郡縣

志》云：『福州爲揚州之域。』而建州乃分福州之地所置，亦當屬揚州之域。星紀須女之分。此據《福州圖經》。而《建安志》以爲分界翼、軫、牛、斗之間。與《福州圖經》所載不同。象之謹按：隆興《滕王閣記》

云：『星分翼、軫。』則是江西爲翼、軫之分，非福建也。今福建在漢隸會稽郡，屬揚州，當爲須女之分。古閩越之地。《寰宇記》。秦屬閩中郡地。《元和郡縣志》。漢立無諸爲閩越王，王閩中故地。《西漢閩越王

傳》。武帝時，因立爲冶縣，屬會稽郡。此據沈約《宋志》云：『漢武帝時，滅閩越，徙其人於江、淮間，盡虛其地。後逃遁山谷者頗出，因立爲冶縣，屬會稽郡。』後漢，改治爲東（侯）「侯」官。《元和郡縣志》。其

後分治地爲會稽東南二部都尉，東部曰臨海，南部曰建安是也。此據沈約《宋志》云。吳孫休時，分會稽南部尉立爲建安郡。此據《吳錄》所載：在孫休永安二年。又《晉志》建安郡下注云：『漢武帝滅閩越，徙其人，更名東冶，又更名東城。後漢更爲〔侯〕官都尉。及吳置建安郡，領建安、吳興、東平、建陽、將樂、邵武、延平七縣。』而〔侯〕官乃隸晉〔原〕〔安〕〔三〕郡，是〔侯〕官自隸晉安屬福，而東冶、東城、東〔侯〕〔侯〕官都尉，自屬建安郡，今爲建州耳。又《寰宇記》云：後漢建武中，爲東〔侯〕〔侯〕官縣。『然《東漢志》卻無東〔侯〕〔侯〕官縣。沈約《宋志》〔侯〕〔侯〕官縣下注云：『後漢曰東〔侯〕〔侯〕官都尉。』宋、齊、《齊志》郡領縣七：曰吳興、建安、將樂、邵武、建陽、綏城、沙村。梁因之，皆封子弟爲王。《通鑑》：宋元嘉二十九年：『立皇子休仁爲建安王。』齊武帝封皇子真爲建安王，梁武帝封弟偉爲建安王。故《元和郡縣志》云：宋、齊、梁，皆封子弟爲王。隋平陳，廢爲建安縣，《隋志》建安縣下注云：『舊曰建安郡，平陳，郡廢。』入泉州，而以建安縣屬焉。屬泉州，《輿地廣記》：是時泉州治福，是以建、福合爲一州也。煬帝立建安郡。《通鑑》：隋末，群盜割據，改建安郡爲泉州。事見下。唐平蕭銑，使者王義童下泉、睦、建三州。《通鑑》：在武德五年。新舊《唐志》及《通典》並云：武德四年置建州。不同。象之謹按：趙郡王孝恭李靖以四年十月平蕭銑，十一月李靖度嶺下九十六州，而唐使者王義童亦以五年正月下泉、睦、建三州。是泉、睦、建三州，武德四年尚未屬唐，則四年之改郡爲州，乃群盜割據之日，非出於唐室之命令也。《唐志》及《通典》所書非是，今不取。以建溪爲名，或以爲建安郡，杜佑《通典》云。領縣五。《唐志》：領建安、邵武、浦城、建陽、將樂。改建安郡，天寶元年。後爲建州。乾元元年。唐末爲閩所有，《通典》〔三〕：王潮據福州，汀、建二州亦降，在昭宗景福二年。閩王王延鈞以弟王延政爲建州刺史。《通鑑》：在〔後〕唐明宗長

興二年。王延政城建州，周二十里。閩王廼以建州爲鎮安軍，以延政爲節度使。延政又改鎮安軍曰鎮武而稱之。《通鑑》：在晉高祖天福六年。王延政以建州爲大殷國，以將樂縣爲鏞州，延平鎮爲鐔州，《通鑑》：在天福八年。南唐查文徽攻建州，《通鑑》：在後晉齊王開運元年。殷王王延政降。《通鑑》：在齊王開運二年。南唐改鎮安軍爲永安軍。《通鑑》：後晉齊王開運二年，唐置永安軍於（達）〔建〕^{〔四〕}州。唐主以百勝軍節度使王崇文爲永安軍節度使，崇文治以寬簡，建人遂安。又後漢隱帝乾祐三年，福州人或（治）〔詣〕建州〔告唐〕^{〔五〕}永安軍留後查文徽，云吳越兵已〔棄城〕^{〔六〕}去。則乾祐時建州尚爲永安軍也。南唐又更永安軍曰忠義軍。《通（典）〔鑑〕》^{〔七〕}：周世宗顯德三年，唐永安軍節度使陳誨敗福州兵于南臺〔江〕^{〔八〕}，唐主更命永安軍曰忠義軍。後降爲軍事。此據《寰宇記》及《九域志》。但二書不言其降爲軍事在何時，蓋自顯德已後則尚屬南唐，而開寶八年平江南始屬本朝，自顯德三年至開寶八年僅二十年間，則其降爲軍事當在開寶八年平江南之時。當考。國朝平江南，初屬江南轉運使，《通略》：太平興國二年，江南轉運使樊若水奏復用銅錢，則是南唐平所管州郡皆隸江南轉運也。其後隸兩浙南路。《圖經》云：在錢氏納土之後。尋以隸福建路，《國朝會要》：在雍熙二年。又陞爲建寧軍。《國朝會要》：在端拱元年。中興以來，以孝宗潛邸陞爲建寧府。《中興小曆》：孝宗以紹興五年六月封建國公，三十年二月封建王。《國朝會要》以紹興三十二年陞爲建寧府。而《建寧志》在隆興二年。不同，當考。領縣七，治建安。

縣沿革

建安縣，望。

倚郭。《元和郡縣志》云：『本漢治縣之地，（又）「後」^{〔九〕}改爲東（候）「侯」官。』《寰宇記》云：『孫策於建安初分東（候）「侯」官之地立此邑，即以年號爲名，屬會稽南部都尉。』《晉志》云：『漢武帝滅閩越，徙其人，名東冶，又更名東城。後漢改爲（候）「侯」官都尉，及吳置建安縣。』《宋志》云：『分治地爲會稽東、南二部都尉，南部建安是也。吳孫休永安三年，分南部立爲建安郡。領縣「七」^{〔一〇〕}。』自漢末名縣曰建安，至今弗改。

甌寧縣，望。

倚郭。《國朝會要》云：『治平三年，析建安、建陽、浦城三縣之地，置甌寧縣，與建安分治郭下。熙寧二年省，元祐四年，復置。』故《九域志》無甌寧縣，蓋甌寧之廢，在熙寧三年。而《九域志》之作，在元豐年間。是時，甌寧廢，屬建安，故《九域志》僅附於廢置諸縣之下耳。

建陽縣，望。

在府西一百三十里。《輿地廣記》云：『晉太康中置，屬建安郡。宋以後因之，後省。』《唐志》云：『武德四

年置，八年省入建安。垂拱四年復置。』此其廢置之大概也。而《元和郡縣志》云：『本上饒縣地，吳分置建平縣，晉太（和）〔元〕四年改爲建陽。』又《寰宇記》亦以爲本後漢建安縣地，割建安縣爲桐鄉。至吳賀齊討上饒之城兼舊桐鄉，置建平縣。故《吳志》云：『建安十年，權使賀齊討上饒，立建平縣』是也。二者不同。象之謹按：上饒縣始置於唐武德四年，而漢建安十年不應有上饒縣。又賀齊討黟、歙賊，立新都郡，乃在今徽州界。其云割桐鄉置建平，今廣德之桐鄉建平縣耳。又云：晉太元四年，改建平爲建陽縣。考之沈約《宋志》，於建陽縣下第云：『晉太康地志』有。是太康中已有建陽縣，非必待至太元四年改建平爲建陽也。《元和志》、《寰宇記》未免牽強，今不取。

浦城縣，〔望〕〔一〕。

在府東北三百三十里。《皇朝郡縣志》云：『本漢東（侯）〔侯〕官之北鄉也。』沈約《宋志》云：『漢末立漢興縣，吳永安三年更名吳興。』晉、宋、齊因之。故晉、宋、齊三《志》，並有吳興縣，江淹嘗爲吳興令。《元和郡縣志》云：『隋平陳，省入建安。』故《隋志》建安郡下無吳興縣。《唐志》云：『本吳興，武德四年，更名唐興。天寶元年，改爲浦城。』以城臨浦，故曰浦城。

崇安縣，望。

在府北二百五十里。《寰宇記》云：『本建陽縣地，僞唐陞爲場。』《國朝會要》云：『淳化五年，陞崇安場置崇安縣。』

政和縣，緊。

在府東二百二十里。《圖經》云：『本福州寧德縣，關隸鎮地，屬福州。』《國朝會要》云：『咸平五年，陞關隸鎮爲縣，隸建州。政和五年，改政和縣。』

松溪縣，上。

在府東二百六十里。《建安志》云：本吳越國處州之東平鄉。王氏據閩，奪而有之，以爲松源鎮。《寰宇記》云：『本建安縣地。舊爲閩越之界，戍兵所屯，號松溪鎮。僞唐保大中得閩地，改爲松溪縣，取舊鎮以爲名。』《圖經》云：『南唐保大九年，陞爲松源縣。國朝開寶八年，改爲松溪縣。』

監司沿革

福建路轉運司

臺治在府城中。國朝自開寶八年，平江南得建州，而尚隸江南路，則建州未應置使也。《國朝會要》云：『雍熙二年，始置福建路。則置使於本路，當在雍熙之後。《丁謂傳》：謂爲福建轉運，初置龍焙，歲貢團茶，則是未置提舉茶事一司，而茶事盡掌於運司耳。其後諸路茶鹽盡歸之提舉司，而福建漕司尚領鹽事，悉貯鹽於下

四州。而今上四州諸縣置綱運，而取其贏以佐漕計。《福州圖經》云：『建炎二年，以建寇故移轉運司於福州。』《繫年錄》云：『紹興二年，還建州。三年復移福州，尋仍舊。』

提舉常平茶事司

臺治在府城中。《中興小曆》：『紹興十二年，時朝廷欲以福建臘茶就行在置局給賣。詔福建見任提舉市舶官更不兼茶事，別置官提舉茶事。』《繫年錄》云：『紹興十二年十月，詔福建專置提舉茶事官一員，置司建州。』至今諸路提舉皆以常平茶鹽繫銜，惟福建提舉則以提舉常平茶事司繫銜。』

風俗形勝

東閩劇地。《權載之集·送建州趙使君序》：『是邦爲東閩劇地，故相安平穆公常理焉。』東南勝地。《建安志》：『南望鐵獅，紫芝以次，群峰旁聯，黃華白鶴之秀，東南勝地。』建安大邦，保界閩粵，綿地八百。《建安志》：楊文公云云。襟山東水，盛均《送建安郡守序》曰：『惟閩嶠枝一臂，西指則建安在焉。其郡襟山東水，其人獠黠而易隨，等閩之支俗，特稀聞善化者。』碧水丹山，珍木靈草，爲郡之勝。梁江淹爲吳興令云。左紫芝，右雲際。《建安志》：『自鐵獅嶺分崗而下，左爲紫芝，右爲雲際，有陸羽泉在其上，又名鴻漸井。』小西川，濯錦橋。建陽出錦，故號小西川，而橋名濯錦。爲政善惡，朕皆知之。《通鑑·唐大中十二年》：建州刺史于延陵入辭，上曰：『建州去京師幾何？』對曰：『八千里。』上曰：『卿到彼爲政善惡，朕皆知。』

之，勿謂其遠。』西山之爽。見紫霞洲注。北苑之最。周絳《茶苑總錄》云：『天下之茶建爲最，建之北苑又爲最。』閩中號佳山水，建安視閩中尤號奇峻，其產天地之寶，棲神仙之所，罔不咸在。《建安志》。東接括蒼，北拒上饒，西南抵延平，南北帶溪。《建安志》。

景物上

幔亭 在府治。

龍石 在建陽縣唐石里，瀕溪有龍像著于石壁。

龍津 《九域志》：建安縣有龍津監庫。

龍山 在浦城縣西、武夷山之北。趙清獻公詩云：石龍仙頂拔巍巔，我此登臨骨凜然。直上更無容足地，速回猶在夕陽天。

龍井 在崇安縣西北五十里。源谷深邃，有二潭，相直如覆釜。

龜山 後唐陳軒讀書于龜山方壽院，及第後重遊，有詩曰：『寒樹似添新喜色，野猿猶聽舊吟聲。』

獅巖 在甌寧縣西鄉里，巨石如獅形。

雞巖 《九域志》云：《建安記》：『與武夷山相對，半巖有雞巢焉。』

泉山 在浦城縣東北六十里。

硯山 在建陽縣東北三十五里。山之西有石如巨硯，相傳華子期師角里先生居于此。

建溪 在建陽縣東一百步。源從武夷山下，西北來縣界也。

松溪 源自處州龍泉縣，流入松溪，合於建安。

杉溪 在松溪縣西三十里，即建安縣界。

柘嶺 《寰宇記》云：在浦城縣西北一百八十里，與麗水縣分界。

茶山 在郡北，民多植茶於此。《輿地廣記》云：在建陽縣。

夢水 《郡國志》云：建州夢水有蜮，似龜，射人生瘡。

吳山 在浦城縣東五里。《記》云：『山四面秀異，人居其側。多吳姓，漢興有吳氏六千戶別屯大澤，

即此之民也。』

響山 在城東五里。其山空洞，枕於溪側，行人相呼若有應者，故名。

孤山 在建安縣西北。蕭子開《建安記》云：『孤山，在環嶂之間，其地坦平，悉是溝塍阡陌，以此山挺

然孤立，因名。』

五峰 在崇安縣東八十里。有金鵝、蓮花、青湖、石畚、〔石〕廩凡五峰，青湖山腰石穴常有風出，

名曰風門。

萬山 在松溪縣東，所產竹樹萬種，因名。

大湖 《輿地廣記》：在浦城縣。

甘泉 在崇安縣吳屯里。中山院在其側，泉甘如醴。

瑞巖 亦名將軍巖，在崇安縣北三十五里。舊傳唐末有唐、葛、周三將軍隱於此。又傳古有雙劍藏於巖下。有瑞巖院，即叩冰和尚道場。趙清獻公詩云：『寒冰叩曉人無垢，古劍藏秋谷有聲。』

雲巖 在甌寧縣西鄉里。

雲谷 在建陽縣西北六十里廬山之巔，高出群峰。

紫芝 在鐵獅嶺之左。《十國志》云：『王氏據閩日，其山產紫芝。』

碧潭 亦名鏡潭，在崇安縣十五里，地名暘谷。潭深不可測，天氣將雨，潭必湧波，人以爲驗。

黃亭 去武夷四十里。陸游《黃亭夜雨詩》云：『未到名山夢已新，千峰拔地玉嶙峋。黃亭一夜風吹雨，似與遊人洗俗塵。』

東溪 《輿地廣記》云：在建安縣，發源於處州松溪。

西溪 發源於崇安分水嶺。

辰山 在建安縣東茺里。有石如鼓，擊之有聲，下有竹洞。

丁水 《建安志》：東西二水交會于城之西南，由南劍入于海。

紅錦 綠錦 出建陽故邑，號小西川，橋名濯錦。徽宗崇觀間造，柱衣欲織錦作升龍，附于柱文輒不合，凡易百工不成。因以殿柱尺度付蜀工，亦不能造。有言建陽民善織者，試使爲之。既成，施之殿柱文，合爲龍不差。

景物下

建安堂

在府治設廳後。

建寧堂

在建安堂之側。

迎暉館

在府治。

薰風堂

在府治。

澄鮮堂

在府治。

思賢堂

在府治北園。以楊文公詩「立」^(一四)碑(立)堂上,命曰思賢。

濯錦橋

建陽出錦,故橋名濯錦。

和豐堂

在府治。

玉仙堂

在府治。

碧雲樓

在府治。

綠野堂

在崇安縣北一里。康定間,趙清獻公抃建。

淶波亭

在浦城縣西南溪。

丹青閣

在開元寺,爲一郡勝槩。

紫芝書院

在郡學之左,創以待四方之賢士。

雙髻山

在建安縣東北。其山兩峰，相並如雙髻。

三層峰

在武夷山北，衆峰尤聳秀。

三姑石

在武夷山溪北岸，三石相聯，望之有姝麗之態。李左史詩云：『風舞芳林鬢脚垂，朝雲行雨

濕仙衣。不知當日緣何事，化石山頭更不歸。』

五龍山

在建陽縣十五里。五山分峙中，有小山如五龍捧珠之狀。

八面山

《寰宇記》云：在浦城縣。

九石潭

在建陽縣東三十里，上列九石。

百丈巖

在松溪縣東三十里。舊傳馬氏女仙於此上昇，其峭壁間有馬蹄、剪刀、尺白痕。

萬葉院

在浦城縣樂平里。寺有八景：曰瀑布、石門、菩薩巖、仙人迹、汗樽、水簾、七星壇、萬石，皆

山水勝絕。

小藏巖

在武夷山。李左史詩云：『玉棺插徧兩巖傍，有罅開如小洞房。煉就陽魂歸紫府，空餘靈骨

此中藏。』

大藏巖

在武夷山。下際深淵石壁，中開數室，皆插板木，室中有器，形狀不一。

大同山

在浦城縣西南九里，絕壁上有龍湫。唐會昌中，有蕭、袁二禪師修行於上，建寺曰大同。

大隱山

在武夷山。巖岫高廣，尤爲佳勝。

大隱屏

在武夷山。李左史詩云：『高峰崛起翠雲屏，何事呼爲大隱名。自是市朝人不到，非關洞戶

鎖崢嶸。』後創武夷精舍於麓中。

大小廩石

在武夷山。二石卓立，如倉廩狀。

大小面石

在武夷山。二石向空，宛如人面。

黃花山

《郡圖》云：『在郡東。元嘉元年，徙郡於黃花山西是也。』

白石山

在崇安縣北三十里。山皆疊石若樓臺，山巔有石室，室有三井。

紫霞洲

《建安志》：堂後爲複屋，鑿池導北山之泉，作亭臨之。號紫霞洲。

烏君山

《寰宇記》：在邵武縣。有仙人徐仲山遇神仙，假烏皮爲羽飛走，因名。

夢筆山

《九域志》云：江淹夢筆之所。《圖經》云：在浦城縣。郭璞有識云：『夢筆山前橫過溪。』

折桂嶺

去浦城縣九十里。舊傳唐人林藻、林蘊兄弟經此，題詩云：『長記嶺頭題姓字，不穿楊葉不

言歸。而今折得兩枝桂，又向嶺頭聯影飛。』

檜巖山

在崇安縣北二十五里。

蓮花石

《圖經》云：洞宮山中有蓮花石。《九域志》：甌寧亦有蓮花峰。

桂枝源

丁晉公《書建安圖經》詩曰：『登雲鄉有桂枝源。』

龍池山

在建安縣西南六十里。

龍湖山

在建陽縣東北六十里。山巔有雙井，曰龍湖。

龍首山

在城西三里。其勢若龍舉首，故名。

龍背潭

在浦城縣西南四十里。潭東有巨石數十丈，狀如龍形。

龍焙泉

《茗溪漁隱》云：『龍焙泉即御泉也。』

虎頭巖

在建安縣秦溪里，山形高峙如虎踞。

虎嘯巖

在武夷山。或云有虎嘯其間。

金雞石

在崇安縣北十五里。巖有瀑水，下有龍井，深不可測。《舊記》云：『或見二金雞翔集其上，

故名。』

鐵獅頂

在城南三里。山巔有庵，庵有鐵鑄文殊獅子像。

白鶴山

在郡城東二里。《寰宇記》云：東晉時，望氣者言此山有異氣，命工鑿之。朝鑿暮合，已而有

白鶴雙翔其上，因名。

鳳凰山

在城東北二十五里。山形如鳳張翅，其地宜茶，號龍鳳茶。

靈鷲山

在甌寧縣崇安里。半崑有亭，亭藏仙骨一函。

勒馬山

在建陽縣南。其形如勒馬，因名。

墜馬川

一名仙人洲。《建安記》云：梅真人上昇，墜馬於此。

濟拔山

在崇安縣東八十里。中有石壇，如琢九井，穴如鎔鑄。

鼓角山

在建陽縣三衢里。三峰峭拔，狀如鼓角。

劍門峰

在甌寧縣崇安里。清溪中注東西，兩山如劍對峙。

鼓樓巖

在武夷溪北。

鍾模石

在武夷山，三石卓立如鍾形。

幔亭峰

一名鐵佛嶂，在武夷山。李左史詩云：『更無裊幕空中舉，時有笙竽靜處聞。猿鳥哀啼千障

月，松篁寒鎖一溪雲。』

欄竿山

在建陽縣北二百九十里。《建安記》云：『欄竿山南與武夷山相對，崑石間懸棺仙葬，多類

武夷。』

車錢山

在武夷山。《古記》云：昔聖姥鞭牛車錢於此。

瀑布泉

在浦城縣北四十五里。萬葉寺後亘地數百尺，天下號爲第三瀑布。

天柱山

在政和縣東七十里。

天湖山

在甌寧縣北十里北津下，其山有三十六景。

天柱峰

一名大王峰，在武夷山。李左史詩云：『巉巖千丈插煙空，始見天南一柱峰。絕頂霧開擎日

月，半崑雲（暝）「噀」^{〔一五〕}噀雷風。』

擎天巖

在甌寧縣西。

滿月山

在政和縣南十里。山勢孤聳，其形如月。

玉清洞

天慶觀在水西，相傳下有玉清洞。《九域志》載，蕭子開《建安志》^{〔一六〕}云：『昔漁人入潭中，

見石室，金額題曰「玉清洞」，有青衣出曰：「此司命真君之府也。」』